

KHEN LINA

MARIA, LAISIANGTHO LEH KHA ADING THUNGETNA TAWMKHA

AVANGLIAN TONU MARIA

Joachim leh Anna ii tanu, Jew numei khat ahi, Maria pen bang hangin “Vanglian Nu Maria” i cithei hiam cihthu Laisiangtho kammal te bulphuh in, tawmkha i kikumkhawm nuam hi.

Topa Jesu banghangin “Vanglian a, bangci bangin hih vangliatna le minthanna” ngah hiam, cihthu i tel leh, bangci bangin, Jesu’ Nu Maria in “vanglian a, minthang hiam” cih thu i tel theipan ding hi. Topa Jesu in Pasion Tapa hi in, honpa leh gumpa ahih manin, avanglian, aminthang dingmah hi ci-in, ol ngaihsut loh ding thupi hi. Banghanghiam cih leh Topa in, tua minthanna le vangliatna pen vantungpan in hongpuasuk hi lo hi cih pen, telding leh theihding athupi mahmah khat ahi hi. Hih thu teltakin, Laisiangtho sungah kigelhhi.

Pasion tapa: Vangliatna puanbangsuah:

Philipian 2: 6-9 na ah, Paul in, “Topa Jesu in Pasion pianzia nei napi in, amah le amah hongki niamkhiat tawma, mihing bangin hongsuak bek thamlo in, singlamteh tungah sihna hong thuakna tawh, sila lim ahong pua hi” ci hi.

Pasion Ta ahihna tawh aneih vangliatna, minthanna, gualzawh na khempeuh te puanbang suahkhia in, mihingin hongpai bek hilo, mite khut nuai ah, thahna nangawn hongthuak hi. Hihthu hangin, kua mah in Topa Jesu’ minthanna pen Pasion Tapa ahih man hi, ci-in i ollak ziau thei ngeikei hi. Misiangtho Paul in banggen lai hiam cih en lai ni:

Philipian 2: 9-11 na ah, “Tua thu hangin, Pasion in amah lam sangto a, minkhempeuh lakpan minlianpen apia hi. Vantung, leitung leinuai a om khempeuhte in, Jesu’ min vang-

liatna mai ah khukdin in, Jesu in Topa hi, ci-in apahtawi na hangin, Pa Pasian' min athangsak ding uh hi," ci-in tel takin honggen hi.

Maria le Jesu Topa: Kiniamkhatna hangin kilamsang

Topa Jesu ii minthanna le vangliatna in akiniamkhatna tungah azungkiphut in, abul kinga hi. Hih thu leh Maria bang kisai hiam ci-in i dongnuam khading hi. Maria in, ama minthanna pen innluahza a angah ahi kei hi. A tapa ahi, Topa nungzui in, atapa mahtawh akibangin, kiniamkhatna hangbek in, "Avang lian Tonu Maria," aki cithei ahihi. Bangci bangin, tua min vangliatna le minthanna ngahhiam cih i en dinghi.

Vantungmi Gabriel in nau napai dinghi. Na neihding tapa in zong, asangbel Pasian Tapa kici ding hi ci-in, aho pih lai tak in, Maria in, Pasian Tapa keisungpan suakding, nuamzenmah sing naci lo hi. Laukawm lingkawm in, bangci bangin piang thei mawk dinghiam ci-in, kiniamkhatna tawh nadongkik hi. Pasian in septheihloh neilo hi acihna aw azaktak ciangin, "Keimah in Pasian sila nu ka hihi. Nagen bangin kei tungah piangta hen," (Lk 1:28-38) ci-in kiniamkhat na tawh anun takna khempueh na ap hi.

Maria: Vantung ka Pa deihna bang asem nu

Matthew 12: 47-50 na sungah, mikhat in Topa Jesu kiangah na Nu le nasanggam te in, nang hong munuam in, apualam ah hongngak hi, ci-in agen ciangin, vantunga ka Pa deihna banga agamta mi in, keima Nu, Ka sanggam te ahihi, ci-in na dawng kik hi. Bang hangin hih ci dawn hiam ci-in, i ngaihsut ciangin (Lk 8: 19-21):

1. Anu in bangci bang 'a Nu' hiam cih ahilhna ahihi. Mite muhna ah, Maria in Jesu' pianna nu ahih manin, si le sa kizop na bek mah in muhsak uhhi. Tua pen Topa in, thei ahih manin, ka Nu pen si le sa tawh ka Nu hi masa lozaw in, vantunga om ka Pa' deihna, asepmah, ka Nu asuak hizaw hi ci-in, mite

ngaihsutna manlo te a khelsak ahihi. Banghanghiam cih leh, Maria in Pasian thu za in, ngai in, manglo hi leh cik mahhun in, Jesu Nu suakngei hetlo dinghi. Tua ahih manin, Maria leh atapa Jesu kizopna in, si le sa hang hi masa lo in, Pasian thu amanna hang ahizaw hi.

2. Lk 11:27-28 na ah, hihthu teltakin i mu theilai hi. Lungdamna thu tangko in, a om laitak in, numei khat ki ko in, Topa hongphat hi. Aphot na aw ngai dih ni: “Na tepnawi le nang hongpaii gil in thupha ngahta hen.” Tua numei nu pah tawi na Topa’n nial hiam? Nial lo hi. Ahih hangin mansa lo ahih manin khelsak hi. “Pasian thu za a, angai mi in, thupha angah zaw hi,” ci-in, khat vei dawngkik leuleu hi. Tua numei nu’n apahtawi na ah, Maria pen Jesu’ pianna Nu ahih natawh, si le sa kizopna en in, apah tawi ahihi. Ahi zongin, Topa in, ka Nu pen napahtawi dingmah hi. Ahi zongin, napahtawi dan mannai lo hi. Napah tawi dan pen leitung vailua hi. Pasian thu kihel nailo hi. Ka Nu pen leitungvai bektawh, leitunglungsim bek tawh hong etsak kei in la, aman in napahtawi in, acih na ahihi. Banghanghiam cih leh si le sa tawh ka Nu ahih nading in, Pasian thu za in amang Nu ahihi, ci-in ahilhna ahihi.

3. Tuhun khangthak mi tampitak te in zong, tuamah bangin, Maria le Topa Jesu kizopna pen si le sa kizopna bekmah in mu uhhi. Tua ahih manin, mipawlkhat te in, Laisiangtho simcian lo pi in, Maria le atapa kizopna pen Aktuihawngtawh genteh thei mawkmawk uhhi. Si le sa kantan a muhna i neih naikei leh, si le sa tawh anungta lo Pasian a umnailo ihihi. I upna in si le sa kantan a, Pasian nasepna te hongmusak ahihi. Tua hi napi in, tuabang khua muhna hongneisak theilo upna in, atung a, Laisiangtho sunga, Topa apahtawi numei nu mah tawh i kibatlum hongkilangsak hi. Ngaihsutmahmah dingkhat om hi: Pasian thu za in, ngai lo, manglo hi zenzen leh, Maria in bang ci bangin Jesu’ Nu suak thei ding hiam? Pasian in, athu amang lo numei, ama deihsang asem lo numei pen atapa’ Nu dingin tel in na um hiam? Hih thuhangin, Topa Jesu in a Nu thu aki

gensim in, “Pasian thu za a, amangmi ...Vantunga om ka Pa deihna bang agamta mi in thupha angah zaw hi,” ci-in hong hilh den ahihi.

Ciapteh huai thu in;

- Si le sa kizopna bektawh Maria le atapa Jesu kizopna i en kha hiam?
- Pasian le Maria kizopna bangci kizopna hiam? Si le sa tawh kizopna hiam?
- Pasian le Maria in, si le sa tawh kizopna aneih kei leh, Pasian taktak ahi Jesu le a Nu Maria kizopna pen si le sa kizopna bek tawh en leng aman ngei ding hiam?
- Pasian thu za a, ama deihna bang asem “mi” sungah Maria kihel kei leh, kua kihel in na um hiam?
- Topa Jesu ii a pahtawi, thupha ngahmi acih, “Vantung a om a Pa deihna bang asem mi” sungah ama “Nu-Maira” zong kihel ahih manin, pahtawi dingkilawm sa lo ding i hihiam?

Jesu Topa nuai ah Minlianpen Nu: Maria

1. Topa Jesu in Pasian pianzia neina pi in, amah le amah hong kiniamkhiat tawm in sila bangin hong nungta hi (Philipian 2: 6-7). Maria in Khasiangtho tawh kidim in, a sangpen Pasian tapa Nu hi napi in, amah le amah hongki niamkhiat in “sila numei” za hongla in, sila bangin hongnungta hi (Lk 1:35,38).

2. Topa Jesu in sila lim hongpua bek hi lo in, singlamteh tungah sihna hongthuak zahdongciangin, amah le amah hong ki niamkhiat hi (Philipian 2:8). Maria in, asungpan apiang atapa pen, asangbel Pasian Tapa hi cih thei hi napi in, amah le amah Pasian Tapa ii NU ahih nate puanbang suah khia in, singlamteh tungah sihna athuak, atapa tawh akibangin, hong ki niamkhiat a, singlamteh phungah atapa tawh lungsim sikhat

sakhatin gawmkhawm in, alungtang teipak tawh sutbang natna hong thuakdongin, kamkhat beek paulo in, Pasian thu na mang hi (Lk2:35; Jn 19:25-26).

3. Hih tehpih omlo aki niamkhiatna hangin, Pa Pasian in, Jesu pen min khempeusang minlianaw pia in, pahtawi hi (Philipian 2:9). Tua mahbangin, Jesu tawh khekhapte suan khawm in, aki niamkhiat atapa' Nu-Maria pen, Pa Pasian in, atapa tawh lamsangto in, a tapa nuai ah, akiniamkhiat pen “MI NU” ahihna hangin, atapa nuai ah, minlian khempeuh sang minlian zaw pia in, pahtawi hi. Jesu Topa ii zomah minlian pen Maria in ngahhi. Banghanghiam cih leh Pasian Tapa zomah aki niamkhiat pen nu ahihna hang ahihi. Paul in Rome mite tung alai khakna ah: Christ tawh akibangin nathuakkhawm leh, ama minthangna sungah zong naminthangkhawm dinghi (Rom 8: 17) ci-in, nahilh hi. Jesu' Nu Maria sangin Jesu Topa tawh gim na athuakkhawm thei kua i muthei dinghiam? Anu in atapa tawh akibangin thuakkhawm ahih leh, ama minthanna leh avangliatna koipan ngahhiam cih Paul genna tungtawn in i thei hi. Jesu Topa tawh akibanga athuakkhawp na in, Maria ii minthan na leh vangliatna hihi.

4. Tua thu hangin, vantung, leitung, leinuai a om, anungta khempeuh te in, Jesu Topa minmai ah khukdin in, Jesu in Topa hi ci-in, aphanatna uh hangin, Pa Pasian min athangsak ding hi (Philipian 2:10-11). Hih thu hangin, atapa Jesu Topa tawh akilamsang to ahi, Jesu Topa nuai ah, min lianpen angah, Maria pen vantung, leitung, leinuai a om, anungta khempeuh te in, Maria in Jesu Topa Nu ahihi ci-in, apah tawi na hangin, Jesu Topa le Pa Pasian min athangsak ding uhhi. “A khang akhangin mikhempeuh te in thupha ngahnu hongci ding hi” (Lk 2:48) ci-in Laisiangtho sungah aki gelhthu atangtu'n nanging, tua Laisiangtho kammal a ummi te nese in Maria in Thupha ngahnu ahihi ci-in, Khasiangtho Pasian makaihna sungah lungsim leh kha tawh phat in, Jesu Topa leh Pa Pasian min athangsak ding ahihi.